

आकाशवाणी

खास-खास खबरां:-

1. चक्रवाती तूफान मोन्था कल रातीं मछलीपट्टनम ते कलिंगपट्टनम मझाटे आंध्र-प्रदेश ते यनम आहले समुंदरी कंडू गी पार करी गेआ ऐ। तूफान करी आंध्र -प्रदेश च 43 ज्हार हेक्टेयर रकबे च फसलां बर्बाद होई गेईयां ना।
2. प्रधानमंत्री नरेन्द्र मोदी अज्ज मुंबई च भारत समुंदरी सप्ताह 2025 च हिस्सा लैडन। ओहू समुंदरी खेत्तर कन्नै जुडे दे दिग्गजें दे सम्मेलन गी संबोधित करडन ते वैश्विक समुंदरी सी.ई.ओ फोरम दी अध्यक्षता करडन।
3. राष्ट्रपति द्रौपदी मुर्मु अज्ज अम्बाला जाडन जित्थे ओहू राफेल लडाकू ज्हाजै च डुआरी भरडन।
4. कोजले ते खान्ने सरबंधी मैहकमे दे केन्द्री मंत्री जी. किशन रेड्डी अज्ज नमीं दिल्ली च बवसायिक कोऽला खदान नीलामी दे 14में चरण दा शुभारंभ करडन।
5. इजरार्इली रक्षा बलें हमास पर युद्धविराम दी उल्लंघना दा आरोप लांदे होई गाजा पर ब्हाई हमले कीते जिं'दे च 9 लोकें दी मौत होई गेई ऐ।
6. भारत ते ऑस्ट्रेलिया बश्कार 5 टी-20 क्रिकेट मैचें दी श्रृंखला दा पैहला मैच अज्ज कैनबरा च खेड्डेआ जाह्ग। मैच भारती समें मताबक दपैहरी मगरा पौने 2 बजे शुरू होगा।

**Montha Cyclone**

चक्रवाती तूफान मोन्था कल रातीं मछलीपट्टनम ते कलिंगपट्टनम मझाटे आंध्र प्रदेश ते यनम आहले समुंदरी कंडू गी पार करी गेआ ऐ। इस दरान 90 शा 100 किलोमीटर फी घंटे दी रफतार कन्ने तेज ब्हां चलियां। मौसम विभाग ने दस्सेआ ऐ जे चक्रवात मोन्था, समुंदरी कंडू पर पुज्जने परैन्त हुन बिंद कमजोर पेई गेआ ऐ। इस तूफान करी आंध्र प्रदेश च भारी बरखा होई ऐ, जेह्दे'नै राज्य च 43 ज्हार हेक्टेयर च फसलां बर्बाद होई गेईयां ना। ओडिशा दे मुख्मन्त्री मोहन चरण माझी होरें आखेआ ऐ जे मोन्था करी ओडिशा गी मता नुकसान नेई होआ ते एहतियाती उपाऽ दे कारण राज्य गी बडी राहत मिली ऐ। राज्य आपदा प्रबंधन प्राधिकरण नियंत्रण कक्ष च चक्रवात दे बाद दी स्थिति दी समीक्षा करने परैन्त श्री माझी होरें आखेआ जे किश इलाकें च छडी किश ल्हास-पस्सियां पौने ते किश दरख्त डिग्गने दिआं गै खबरां ना। राश्ट्री आपदा मोचन बल ने तूफान दे मद्देनजर 26 टीमां तैनात कीतीआं न, जिं'दे चा 12 आंध्र प्रदेश च, 6 ओडिशा च ते त्रै उत्तरी तमिलनाडु च ना। केंद्री सेहत मंत्रालय ने आंध्र-प्रदेश, ओडिशा ते तमिलनाडु सने समुंदरी कंडू आहले पूर्वी राज्यें दे वरिश्ठ अधिकारियें दे कन्नै चक्रवात मोन्था दिएं तैयारियें दी समीक्षा कीती।

**Ashwini Cyclone**

रेल मंत्री अश्विनी वैष्णव होरें आंध्र-प्रदेश दे मुख्मन्त्री चंद्रबाबू नायडू, ओडिशा दे मुख्मन्त्री मोहन चरण माझी ते सरबंधत रेल अधिकारियें दे कन्नै चक्रवात मोन्था दे बाद दौनें राज्यें च रेल सेवा दी तुरत ब्हाली बारै चर्चा कीती। श्री वैष्णव होरें सोशल मीडिया पोस्ट च आखेआ जे चक्रवात मोन्था गी दिक्खदे होई, मंडल, क्षेत्रीय ते बोर्ड स्तर पर वॉर रूम सक्रिय करी दित्ते गेदे न ते लोडचदी गैहीं पुट्टियां गेदिआं ना। उ'नें आखेआ जे विजयवाडा, विशाखापत्तनम ते गुंटूर च रेलवे दिआं टीमां अलर्ट पर न ते रेलगड्डियें दी आओजाई च कुसै चाल्ली दी रूकावट रोकने लेई सख्त निगरानी कीती जा'रदी ऐ।



PM Maritime Week

प्रधानमंत्री नरेन्द्र मोदी होर अज्ज मुम्बई जागंन- जित्थे ओह भारत समुन्द्री सप्ताह 2025 च हिस्सा लैगंन। ओह समुन्द्री क्षेत्र कन्नै थवां जुडे दे माहिरें दे सम्मेलन गी सम्बोधित करगंन। ओह वैश्विक समुन्द्री फोरम दी बैठक दी अध्यक्षता करगंन। सोशल मीडिया दी इक पोस्ट च मोदी होरें आखेया जे एह सम्मेलन समुन्द्री क्षेत्र च सहयोग बढ़ाने ते ओदे च भारत दे सुधारें गी उजागर करने दा बेहतरीन मंच ऐ। अजे तगर इस दौरान केंई सारे सत्र आयोजित होए न- जिंदे च Green Maritime-Cruise समुन्द्री वैश्विक सप्लाई चैन गी पूरी चाली बहाल रखना वगैरा शामिल हे। इस दौरान नीली अर्थ-बवस्था गी तकनालोजी-नभियें काहडें ते लगातार ते टिकाऊ बनाई रखने पर बी चर्चा होई।



Prez Ambala Rafale

राष्ट्रपति द्रौपदी मुरमू होर हरियाणा दी अबाला थाहर जागंन। ओह उत्थे राफेल च डोआरी भरगंन। उनें पिच्छली बारी अप्रैल 2023 च असम दे तेजपुर स्थित वायुसेना स्टेशन थवां सुखोई 30 MKI लडाकू जहाज च डोआरी भरी ही।



Sardar Patel Memorial Lecture

केन्द्रीय श्रम-रोजगार-युवा मामले ते खेड्डु मंत्री डाक्टर मनसुख मांडविया होर अज्ज संजा नमीं दिल्ली च इस बरे दा सरदार पटेल स्मृति व्याख्यान देगंन। सूचना ते प्रसारण राज्यमंत्री डाक्टर एल. मुरुगन होर वल्लभ भाई पटेल हुंदे सम्मान च होने आहले इस कार्यक्रम च शामिल होगंन। आकाशवाणी हर बरे सरदार पटेल हुंदे स्मृति व्याख्यान दा आयोजन करदा ऐ। केंई सारे मन्ने-परमन्ने दे नेता- साईंसदान ते इतिहासकार पैहले इस सरबन्धै च व्याख्यान देई चुके दे न।



Coal Auction

कोऽले ते खानें सरबन्धी मैहकमे दे केन्द्री मंत्री जी. किशन रेड्डी अज्ज नमीं दिल्ली च बवसायिक कोऽला खदान नीलामी दे 14में चरण दा शुभारंभ करडन। कोऽला मंत्रालय ने दस्सेआ ऐ जे इस नीलामी दा मकसद बपार सुगमता गी बढ़ाना, बक्ख-बक्ख खेत्तरें थमां रास-पूंजी आकर्षित करना ते उद्योगों दी भागीदारी गी प्रोत्साहित करना ऐ। मंत्रालय ने आखेआ ऐ जे ओह पैहली बारी नीलामी ढांचे च जिमीं हेठ कोऽला गैसीकरण- यू.सी.जी दा प्रावधान शुरू करा'रदा ऐ। 14में दौर च नीलामी लेई पूरे ते अद्दे-दुब्बे तौरा पर खोजे गेदे कोऽला ब्लॉकें दा इक नमां सेट पेश कीता जाहगा। एहदे च तजुर्बेकार ते नमीं कंपनियें ते तकनीकें आसेआ संचालित उद्यमें कन्नै भागीदारी आमंत्रित कीती जाहगा। इस दरान कोऽला मंत्रालय द'उं परिवर्तनकारी डिजिटल प्लेटफॉर्म, कोऽला जिमीं अधिग्रहण, प्रबंधन ते भुगतान - क्लैम्प पोर्टल ते कोऽला शक्ति डैशबोर्ड दा बी शुभारंभ करग।



Israel Attack Gaja

इस्राइली रक्षा बलें हमास पर युद्धविराम उल्लंघन दा आरोप लांदे होई गाजा पर हवाई हमले कीते जेदे च 9 लोकें दी मौत होई गई। एह हमले प्रधानमंत्री बेन्यामिन नेतन्याहू हुंदे बलपूर्वक कारवाई दे आदेश दे मगरा कीते गे। इस्राइली अधिकारियें मूजब हमास नै रफा इलाके दे कोल रॉकेट प्रोपेल्ड ग्रेनेड ते स्नाईपर फायर राएं इस्राइली सैनिकें पर हमला कीता हा। इस्राइल दे रक्षामंत्री इस्राइल कैट्ज होरें चेतावनी दिती ऐ जे हमास गी इसदी बड्डी कीमत चुकानी होग। हमले दे फौरन मगरा इस्राइल दे हवाई हमले च गाजा सीटी दे अल-सबरा ते खान यूनिस् क्षेत्र गी नशाना बनाया गया। तोंआई हमास नै इस्राइली सैनिकें पर हमले दे आरोपें दा खंडन कीता ते इस्राइल पर युद्ध विराम दा उल्लंघन दा दोष लाया।



Jitender Singh- Al Hindi

साईस ते टैक्नालोजी मंत्री डाक्टर जितेन्द्र सिंह होरें आखेया जे ए.आई. संचालित अनुवाद उपकरण राएं हिंदी सामग्री दे प्रसार ते अनुवाद गी बढ़ावा थ्होआ रदा ऐ। डाक्टर जितेन्द्र सिंह होरें कल नमीं दिल्ली च मंत्रालय दी हिंदी सलाहकार समीति दी पैहली बैठक गी सम्बोधित करदे होई आखेया जे सारे मंत्रालयें ते विभागें च हिंदी दा इस्तेमाल जरूरी ऐ किजे हिंदी छड़ी इक भाषा गै नेंई सगुआ मुख् दी संस्कृति दी पंछान बी ऐ। उनें आखेया जे सारे मंत्रालयें दी वेबसाईट हिंदी च बी उपलब्ध होनी लोडचदी तां जे एह यकीनी बनी सकै जे नागरिकें गी साईसी जानकारी उंदी अपनी भाषा च थ्होई सकै।



Cabinet Decisions

केन्द्रीय मंत्रीमंडल नै 8में केन्द्रीय वेतन आयोग दे कार्यक्रमें गी मंजूरी देई दिती ऐ। नमीं दिल्ली च सूचना ते प्रसारण मंत्री अश्विनी वैष्णव होरें मंत्रीमंडल दी बैठक मगरा संवाददाताएं गी दस्सेया जे आयोग अपने गठन दी तरीक दे 18एं महीने दे अंदर सिफारशां देग। उनें दस्सेया जे मंत्री होरें 2025-26 आहली हाड़ी रूतै लेई फास्फेटिक ते पोटाशियम हेले पर पोषक तत्व आधारित सब्सिडी दरें गी बी मंजूरी दिती ऐ। वैष्णव होरें दस्सेया जे मंत्रीमंडल नै हाड़ी रूतै 2025 आस्तै लगभग 37 हजार 952 करोड़ रपे दी सब्सिडी गी मंजूरी दिती ऐ। एह दरां पैहली अक्बर थवां लागू ना।



Cricket

भारत ते ऑस्ट्रेलिया बश्कार 5 टी-20 क्रिकेट मैचें दी श्रृंखला दा पैहला मैच अज्ज कैनबरा च मनुका ओवल मैदान च खेड्डेआ जाह्ग। एहू मैच भारती समें मताबक दपैह्ली मगरा पौने 2 बजे शुरू होग। सूर्य कुमार यादव दी कप्तानी च भारती टीम इस मैच च जित्त दे कन्नै श्रृंखला दी शुरूआत करना चाह्ग। दौनें देशें लेई एहू श्रृंखला बड़ी महत्वपूर्ण ऐ। आई.सी.सी टी20 रैंकिंग च पैहले ते दुए नम्बरै दिआं एहू टीमां आमने-सामने होडन ते एहू अगले बरे फरवरी ते मार्च म्हीने होने आह्ले टी20 विश्व कप दी तैयारी लेई बड़ा महत्वपूर्ण होग। भारत ते ऑस्ट्रेलिया बश्कार पिच्छला टी-20 मुकाबला बरे 2024 दे विश्व कप च सुपर-8 च होआ हा, जित्थे भारत दी जित्त होई ही। भारती टीम च जसप्रीत बुमराह दी वापसी कन्नै खड्डारिएं च मता जोश ऐ। बुमराह गी अस्ट्रेलिया दे कन्नै हाल च होए दे इक ध्याडे आह्ले मैचें दी क्रिकेट श्रृंखला च अराम दित्ता गोदा हा।



Asian Youth Games Boxing

भारती पलोआन यशिता ने बहरीन दे मनामा च चला'रदी एशियाई युवा खेड्डें च कुडिएं दे 61 किलोग्राम फ्रीस्टाइल मुकाबले च सुन्ने दा तगमा जित्तेआ ऐ। 17एं बरें दी यशिता ने बडे सख्त मुकाबले च कज़ाकिस्तान दी ज़ैदर मुकात गी 5-5 दी बरोबरी दे बाद सख्त मुकाबले च हराइयै जित्त हासल कीती। एहू एशियाई खेड्डें च भारत दा चौथा सुन्ने दा तगमा ऐ। उंदा एहू तगमा भार तुलकने आह्ली खड्डारन प्रीति स्मिता भोई दे पैहले सुन्ने दे तगमे परैन्त भारत दा दुआ व्यक्तिगत सुन्ने दा तगमा बी ऐ

